



**Kalaallit Nunaanni meeqqat pillugit inatsisip Kalaallit Nunaannut atuutilersinnissaanut peqqussutissatut missingiummut aamma meeqqat pilersorneqarnerat il. il. pillugu inatsisip Kalaallit Nunaannut atuutilersinnissaanut peqqussutissatut missingiummut Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.**

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

(Siullermeerneqarnera)

Demokraatit Naalakkersuisut uuma aalajangersagassatut missingiutip Kalaallit Nunaanni atuutilernissaanut tungasoq saqqummiunnaassuk qujassutigaa. Tassani pineqarpoq danskit inatsisaat, Kalaallit Nunaanni atulersinneqartussatut kissaatigineqartoq. Taamaattumik oqartoqarsinnaangilaq Naalakkersuisut namminneq, suliniuteqarnermikkut meeqqat pilersorneqarnerat pillugu inatsimmik nutarterinissamik kissaateqartut. Naalakkersuisulliuna Folketingimi aalajangerneqarsimasut isumaqatigiinnarsimagaat.

Isumaqarpugut, siunnersuut Demokraatit Naalagaaffeqatigiinnermi assigiissumik periarfissaqarnissamik kissaataanut ataqatigiilluinnartuusoq, unalu ersarissumik assersuutissaalluinnarpoq.

Iluarisimaarluinnarparput, angajoqqaat suaiaqatigiit maanna meeqqanut inatsisitigut

akisussaaqatigiinnissaat qulakkeerneqarmat, uani anaanaaqataasutut nalunaarsorneqarsinnaalerlutik.

Peqqussummi pingaarnertit ukuupput: Anaanaaqataaneq, ataataaneq, meeqqanut akilersuutit, meeqqat pilersorneqarnerat meeqqallu kingornussisussaataaerermikkut inatsisimanerat. Eqqartuussisarnermut inatsisip tulluussarneranik tamanna kinguneqassaaq, Inatsisartuni akuerineqassagaluarpat soorlu inatsisit allat tulluussarneqartartut Inatsisartut katersuunnerminni siuliini taamaattoqartartoq.

Meeqqat pillugit aqqissuusseqqiiinerup uuma imarisai, oqallisigisinnaavagut. Ilumut meeqqat pillugit annertuumik aqqissuusseqqiiinnerua? Ingasattajaarnerulaarpoq innuttaasut oqaluttuutissallugit, nunatsinni meeqqanut aqqissuusseqqiiisoqalersoq. Imarisaa misissorluareerlugu takusinnaavarput angajoqqaajunerup nalunaarsorneqarneranik allannguinerinnartut isikkoqartoq. Taamatullu, suliaq politiinit naalagaaffiup susassaarfiiinut ilagiinnullu ingerlateqqinneqartoq. Soorunami neriuppugut politiinut eqqartuussiveqarfinnullu iluaqutaajumaartoq, taamaalilluni nukiit killeqareersut sulianut allanut pingaarutilinnut, atorneqarsinnaangorlugit. Aappaattut, angajoqqaangorlaat pisariinnerusumik angajoqqaangorsimanermut nalunaarsorneqarsinnaangorlutik.

Taamatut oqareerlunga oqaasertalinngitsoorusunngilara politikikkut sammivia aqqissuusseqqiiinerit pisariaqartut eqqarsaatigalugit.

Naalakkersuisut siunnersuummini nassuiarpaat, siunnersuut sivisuumik kissaatigineqarsimasoq, taamaattumillu iluarisimaarlugu suliap massuma akuersissutiginnissaa, Folketingimit akuerineqareersoq Nunatsinni atuutsinneqalissasoq. Naalakkersuisut siulittaasuata ammaanersiorluni oqalugiarnermi, kinguneranilu tusagassiuutinik oqaloqateqarnerani, paasisorilluinnararpara, Kalaallit Nunaanni meeqqat



pillugit annertuumik nutartikkamillu aaqqiissusseqqiisoqalersoq. Una siunnersuut atuarakku, paasiinnarpara danskit inatsisaat pineqaannartoq kissaatigineqarlunilu, Inatsisartut suliarissagaat inatsisip allanngortinnissaa angajoqqaajussutsimut tunngasoq kalaallinut atuutilersinneqartussanngorluni, danskit assigalugit. Paaserpiannigilarali, Naalakkersuisut meeqqanut akilersuutitut tunngasunut iliuusererusutaat takorluugaallu suunersut. Nalunngilara, Inuit Ataqtigiinninngaanniit ilaasortap ataatsip Kalaallit Nunaanni meeqqat piitsut pillugit oqallisikkusukkaatigut. Aalajangigassatut siunnersuutaanngitsoq, apeqquteqaalli tunngavigalugu oqallisissiatut. Paaserusulerparalu, Naalakkersuisut siumoortumik partii aallaavigalugu sulinersut meeqqanut akilersuutit qaffanneqaratarnissaat pillugit? Ilisimavarput innuttaasut meeqqanut akiliutitut milliardip affaanik akiligassaqartut- Taamaammat tusarusuppara Naalakkersuisut, innuttaasut pisortanut akiligassaasa siunissami qanoq akilersornissaat eqqarsaasersuutigineraat – aamma meeqqanut akilersuutit qaffannialersaernerannut sanilliullugu. Taamaaliorneq pinngitsoorani arlalinnut aqutassaannngitsumik akiitsoqalernermik kinguneqassaaq, angajoqqaat akiliisinnaassusaat eqqarsaatiginagu meeqqap pilersorneqarneranut aningaasartuutaasut pingaernerutinneqassappata, naggataatigut pisortanut akiitsoqarnerulernermik kinguneqartussat. Mianersuutigeqqissaartariaqarparput, meeqqat taakkoqqissaat inersimasunngorunik, akiligassaq kingornussinnaammassuk, politikkikkut uagut inersimasutut pissusilersornissarput sapersimagatsigu meerartagullu inuiaqtigiinnut akiitsoqalernissaat akilersinnaanngisaminnik illersorsinnaasimanagu.

Taamatuttaq Naalakkersuisut tungaanniit oqaasinngorlugu kissaatigineqarpoq nukittuffigut sanngiiffitsinnit annertunerusumik ukkatarineqassasut. Tamanna kusanaqaaq, inuttut tarnikkut pitsaasumik isiginnittariaaseq atorusunneqarmat. Tassungali ilutigalugu erseqqissartariaqarpara, pisortat inatsisit aallaavigalugit inuiaqtigiinni isumagisassanik isiginngitsuusaarinninniarnertut isigigakku. Annilaangassutigaara, Naalakkersuisut namminneerlutik nukittuffinnik ukkatarinninniarnermi aaqqiissuusaanikkut ajornartorsiutigut soorlu assersuutigalugu meeqqatsinnik, inuusuttatsinnik, innarluutilinnillu ataasiakkaatut aaqqiissuusaanikkullu atonerluineq sumiginnaanerlu, aanngajaarniutinik atonerluineq, angerlarsimaffeqaanngitsut, ilinniarluarsimanngitsullu il.il. pingaannngittutut inissisimatilersinnaammatigit, Taamaattumik apeqqutaalluinnarpoq, aaqqiissuulluakkamik inatsisitigullu tunngaveqartumik pinaveersaartitsinissarput.

Taamaattumik ajornanngippallaaqaaq Naalakkersuisut inuiaqtigiinni ”ajunngitsut pitsaaqutillu” ukkatarineqarnissaannik kissaateqaannaraluarpata taamaaliornikkullu inuiaqtigiit nukittussuterpassui isiginngitsuusaarlugit. Demokratii innarlissavarput inuiaqtigiinni assigiinngissutsit tamaasa oqaasinngortinngikkutsigit. Inuiaqtigiit nukittuut ilisarnaatigaat, qanoq inuit aaqqiissuusaanitta kinguneranik isumaginninnikkut atugarliortut iliuuseqarfigineqarnerannik – taamaattumillu akisussaafferujussuarmik tigummiarpugut Naalakkersuisuugutta Inatsisartuuguttaluunnit sinaakkusersuissalluta aaqqiissusseqqiiisallutalu, siunissami inuit ataasiakkaat nukittornerannik kinguneqartussanik. Isumaqanngilanga, imatut siunnersuuteqarnerinnakkut naammattoq, siunnersuut allanngortiterinerinnaammat naak anaanaaqataalernermut isiginnittariaaseq pitsaagaluartoq angajoqqaallu pisinnaatitaaffi nukittorsarneqarlutik.

Piitsuunerup qaangernissaanut aqqut inuiaqtigiittullu pigissaarnerulerneq ilinniartitaanikkut aammalu akisussaassuseqartumik angajoqqaat suleqatigiinnerannik pissaaq. Tamanna atuartunngunnginnermi



aallartereertassaaq pingaartumik meeqqat atuarfiini. Aaqqissuusseqqiinerit eqqartorneqarnissaat pisariaqartoq kinguarsaqqissinnaanngilarput, soorli Aningaasaqarnermut isumalioqatigiisitap aamma, ukiut tamaasa, ersarissartaraat. Taamaattumik pissusissamisoorpoq apeqqutigissallugu, qanoq Naalackersuisut angajoqqaatut akisussaanermut inatsit tamaat aaqqiissuusseqqiinissamik takorloorneraat, politikikkummi kissaataammat inuiaqatigiit pisuunerulissasut, inuttut ataasiakkaanut isumaginninnikkullu.

Taamatut oqaaseqarluta siunnersuut ataatsimiititaliamut attuumassuteqartumut ingerlateqqinneqarnissaa innersuupparput siornatigut, eqqartuussisarnermut inatsisip paragraffiisa allanngortinnissaannut akuersissutigineqareersimasuni siunertat ataqatigiisikkumallugit.